



Na osnovu člana 86h. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 6. i 7. Pravilnika Visokog sudskog i tužilačkog vijeća Bosne i Hercegovine u vezi sa izvještavanjem o imovini i interesima („Službeni glasnik Bosne i Hercegovine“, br. 20/24 i 57/24), kao i Sporazuma Visokog sudskog i tužilačkog vijeća Bosne i Hercegovine sa Komisijom Evropske unije o modalitetima za angažman nezavisnih stručnjaka država članica Evropske unije za vanjsko praćenje rada Odjela za provođenje postupka po izvještajima o imovini i interesima VSTV-a BiH, Visoko sudsko i tužilačko vijeće Bosne i Hercegovine, u sastavu sudija Halil Lagumdžija, predsjednik Vijeća, sudija Aleksandra Obradović, potpredsjednica Vijeća, sudija Sanela Gorušanović - Butigan, potpredsjednica Vijeća, tužilac Sanin Bogunić, mr. Lejla Hadžić, tužilac Saša Sarajlić, tužilac Željka Fabić, sudija Ljiljana Bošnjak - Glizijan, advokat dr. sc Davor Martinović, advokatica Duška Bogojević, sudija mr. Srđan Forca, sudija Mustafa Šabić, advokatica Amila Kunosić, tužilac Snježana Petković i tužilac Biljana Simeunović, na sjednici održanoj 5. septembra 2024. godine, donijelo je

## **ODLUKU**

### **o angažovanju stručnjaka za vanjsko praćenje rada Odjela i disciplinskih postupaka**

- I. Za stručnjaka za vanjsko praćenje rada Odjela za provođenje postupka po izvještajima i disciplinskih postupaka angažuje se Maria Giuliana Civinini, na period od četiri (4) godine.

## **Obrazloženje**

Na osnovu člana 86h. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 6. u vezi sa članom 7. Pravilnika Visokog sudskog i tužilačkog vijeća Bosne i Hercegovine u vezi sa izvještavanjem o imovini i interesima (u daljem tekstu: Pravilnik VSTV-a BiH), Visoko sudsko i tužilačko vijeće Bosne i Hercegovine (u daljem tekstu: Vijeće) je na sjednici održanoj dana 5. septembra 2024. godine angažovalo stručnjaka za vanjsko praćenje rada Odjela za provođenje postupka po izvještajima i disciplinskih postupaka i to: Maria Giuliana Civinini.

Vijeće, imajući u vidu nadležnosti stručnjaka za vanjsko praćenje rada Odjela za provođenje postupka po izvještajima i disciplinskih postupaka, propisanih odredbom člana 86h. Zakona o VSTV-u BiH, a u skladu sa poglavljem III Pravilnika VSTV-a BiH „Vanjsko praćenje Odjela za provođenje postupka po izvještajima“, ima ovlaštenje angažovati nezavisne stručnjake za vanjsko praćenje rada Odjela za provođenje postupka po izvještajima i disciplinskih postupaka, odabrane od međunarodnih partnera.

U skladu sa odredbom člana 7. Pravilnika VSTV-a BiH imajući u vidu ovlaštenje Vijeća za zaključenje sporazuma sa međunarodnim partnerima kojim će se osigurati minimalna pravila u smislu člana 7. stav (3) Pravilnika VSTV-a BiH, Vijeće je 4. septembra 2024. godine odobrilo Sporazum sa Komisijom Evropske unije o modalitetima za angažman nezavisnih stručnjaka država članica Evropske unije za vanjsko praćenje rada Odjela za provođenje postupka po izvještajima o imovini i interesima VSTV-a BiH.

Imajući u vidu da su nadležne službe Evropske unije dostavile imena i biografije kandidata za angažovanje za pozicije stručnjaka za vanjsko praćenje rada Odjela za provođenje postupka po izvještajima i disciplinskih postupaka, to je VSTV BiH u smislu člana 8. Pravilnika VSTV - a BiH utvrdio da Maria Giuliana Civinini ispunjava profesionalne kvalifikacije naznačene u stavu (2) člana 8. Pravilnika VSTV-a BiH.

Naime, VSTV BiH je utvrdio da je Maria Giuliana Civinini osoba sa višedecenijskim pravosudnim iskustvom, koja je obavljala dužnosti sudije i to u periodu od 1983. do 2023. godine, da je, između

ostalog, vršila dužnost članice Visokog pravosudnog vijeća u Republici Italiji, da je u periodu od 2008. godine do 2011. godine bila raspoređena u Misiji zajedničke sigurnosne i odbrambene politike EULEX Kosovo na mjestu predsjednice Kolegija sudija EULEX-a, da je u periodu od 2017. do 2019. godine vršila dužnost zastupnika talijanske Vlade pred Evropskim sudom za ljudska prava, te da je u periodu 2019. – 2023. godina obavljala dužnost predsjednice Suda u Pisi.

Iz biografskih podataka je vidljivo da je za vrijeme obavljanja poslova i dužnosti u Misiji zajedničke sigurnosne i odbrambene politike EULEX Kosovo na mjestu predsjednice Kolegija sudija EULEX-a vršila poslove koji su se odnosili na imovinska pitanja. Dodatno, posjeduje višegodišnje radno iskustvo u upravljanju međunarodnim projektima, te je učestvovala u radu Konsulativnog vijeća Evropskih sudija, a ujedno ima iskustvo rada u državama okruženja.

Maria Giuliana Civinini je u svom dugogodišnjem radnom iskustvu saradivala i sa VSTV-om BiH, ali i kao ekspert je pružala podršku u radu Institucija za provođenje provjera u Albaniji.

Vijeće je prilikom donošenja odluke o angažovanju stručnjakinje koju su odabrale službe Evropske unije putem procedure koja zahtijeva standarde otvorenog i transparentnog konkursa, vodilo računa da je riječ o diplomiranoj pravnici sa višedecenijskim pravosudnim iskustvom, koje uključuje iskustvo u međunarodnim misijama koje se bave pravosuđem, dakle da je u pitanju osoba sa odličnom profesionalnom reputacijom, koja poznaje engleski i francuski jezik, a koja se ujedno dokazala u međunarodnom okruženju u pravosuđu, te ima iskustvo u pitanjima provjere imovine nosilaca pravosudne funkcije.

Zbog svega, Vijeće je u skladu sa odredbom člana 86h. Zakona o VSTV-u BiH, dana 5. septembra odlučilo angažovati i to: Maria Giuliana Civinini, na period od četiri (4) godine na poziciju stručnjaka za vanjsko praćenje rada Odjela za provođenje postupka po izvještajima i disciplinskih postupaka.

Imajući u vidu sve iznesene razloge, Vijeće je odlučilo kao u izreci ove odluke.

Ova odluka će se objaviti na internetskoj stranici Vijeća, bez odlaganja.

Broj: 08-14-1-3172-3/2024

Datum: 13. septembar 2024. godine

